

Aitor Hernández, ziklo-kroseko txirrindularia:

“Ondo nabil, baina sponsorra lortu ezean ez dut honetan jarraituko”

Ziklo-kros denboraldia bukatzeko ia 20 lasterketa geratzen badira ere, Aitor Hernández ermuarrak erakutsi du sasoi ezin hobean dagoela. Superprestigio kategorian 2. doa (Egoitz Murgoitio puntu gutxira du) eta txapelketa horretan, Euskadikoan eta Espainiakoa bere onenak ematea du helburu txirrindulariak. AEBeko mundialean ere lekua izan nahiko luke, baina bere karreran aurrera egiteko sponsor baten premia sumatzen du.

- Aurtengo ziklo-kros denboraldia urriaren 6an hasi zen eta 13 lasterketa egin dituzue dagoeneko. Zer nolako emaitzak lortu dituzu orain arte?

Zazpi lasterketa irabazi ditut eta gainontzekoetan lehen 3ren artean sailkatu naiz. Horri esker, Espainiakoa rankinean 1. postuan nago.

- Euskadiko challenge-ean aritzen zara eta baita Superprestigioan (estatuko txirrindulariak batzen dituen kategorian, alegia). Alde handia igartzen da txirrindularien mailan?

Ez. Estatuko ziklo-krosean mailarik onena duten txirrindulariak hemengoak dira: Egoitz Murgoitio Abadiñokoa da eta Javier Ruiz de Larrinaga arabarra da eta Euskadiko challenge-an korritzen dute astebururo, nirekin batera. Superprestigioan 4 lasterketa egin ditugu eta bi irabazi ditut eta beste bitan 2. postua lortu dut.

- Zein da denboraldi honetarako duzun estrategia?

Denboraldia ondo hasi eta ondo amaitzea gustatzen zait, hau da, erregularra izatea. Beste batzuk, lasai hasi eta helburu bat ipintzen diote euren buruei: “Espainiako txapelketa irabaztea, urtarilaren erdialdera”, esaterako. Niri, ordea, hasieratik dena ematea gustatzen zait, ahalik eta lasterketa gehien irabaztea.

- Aurten zure mailarik altuena lortu duzula esango zenuke?

Hobetzeko tarteak dudala uste dut. Abenduan nazioarteko lasterketak ditugu Igoarren eta Asteasun, atzerriko txirrindulariak etorriko dira eta ondo aritzea espero dut. Hala ere, gaur eguneko mailari eutsiko banio, pozik egongo nintzateke.

- Iaz ere sasoi onean ibili zinen, ezta?

Bai, 6 lasterketa irabazi nuen, baina aurten esperientzia handiagoa daukat. Kirol honetan, forma fisikoaz gain, teknika oso garrantzitsua da: bihurtuak hartzeko mo-



dua, bihurtuak bat hurrengoarekin lotzea... Nik teknika-aren arloan gabeziak ditut oraindik eta esfortzu gehiago egin behar dut besteen erritmoa jarraitu ahal izateko. Apurka-apurka hobetzen noa, hala ere. Zirkuituxoa daukat Arraten eta bertan prestatzen dut nire burua.

- Duela astebete ETBn egindako elkarrizketan aipatzen zenuen kanpora joatea gustatuko litzaizukeela. Hemen zailagoa da aurrera egitea?

Ziklo-krosaren elitea Belgikan eta Holandan dago, baina nik ezin dut lasterketa bat egiteko bertaraino joan. Sekulako gastua da! Sponsorra izanez gero, bertara joan, lasterketa egin eta beharbada 15 eguneko prestaketa egin nezake. Gu baino aurreratua go daude eta eskolak dituzte.

- Nola ikusten duzu etorkizuna?

Estatuko egutegiko lasterketetako gastuei aurre egin laguntzen didaten sponsor txikiak ditut, baina kanpora irteteko 20.000 edo 30.000 euro inguru beharko nituzke. Ziklo-krosean sariak oso baxuak dira, 120 euro ingurukoak, baina tira, momentu honetan ez dut dirua galtzen, behintzat!

- Jarraitzeko asmorik, beraz?

Denboraldia bukatzen denean, otsailean, jarraituko dudak pentsatu beharko dut. Sponsorra lortu ezean, zaila ikusten dut maila honetan jarraitzea, afizio moduan jarraituko nuke. Masaje kontsulta dut, bizimodua atera behar dudalako, eta lan horretan zentratuko nintzateke.

Dorleta Vidal

Pub SCORPIO



Zubiaurre, 21
ERMUA



PUB YOMY

**Zubiaurre
kalearen
bihotzean**